

CYFARFOD	Y CYNGOR
DYDDIAD	13 Rhagfyr, 2007
TEITL	Ad-drefnu Ysgolion Cynradd y Sir er Lles Addysg Holl Blant Gwynedd
PWRPAS	Cyflwyno Cynllun Cyfansawdd Drafft ar gyfer Ad-drefnu Ysgolion Cynradd y Sir
ARGYMHELLIAD	Derbyn yr Argymhelliad
AWDUR	Iwan T. Jones, Cyfarwyddwr Strategol Datblygu
ARWEINYDD PORTFFOLIO	Y Cynghorydd Richard Parry Hughes, Arweinydd Arweiniol Plant a Phobl Ifanc Y Cynghorydd Dafydd Iwan, Uwch Arweinydd Portffolio Datblygu Y Cynghorydd Dyfed Edwards, Arweinydd Portffolio Ysgolion

1. CEFNDIR

- 1.1. Mae copi o'r ddogfen "*Ad-drefnu Ysgolion Cynradd y Sir er Lles Addysg Holl Blant Gwynedd*" eisoes wedi'i chylchredeg i Aelodau'r Cyngor.
- 1.2. Dyma'r ddogfen sy'n cyflwyno'r achos dros ad-drefnu ysgolion cynradd Gwynedd.
- 1.3. Tafodwyd cynnwys y ddogfen yng nghyfarfod arbennig o Bwyllgor Craffu Plant a Phobl Ifanc ar 25 Hydref, 2007.
- 1.4. Dyma oedd penderfyniad y Pwyllgor Craffu:
 - (a) Cyfleu i Fwrdd y Cyngor yn ei gyfarfod ar 20 Tachwedd, 2007 gymeradwyaeth y Pwyllgor Craffu Plant a Phobl Ifanc, mewn egwyddor, i nôd, amcanion a phrif strategaeth y Cynllun ac i sicrhau bod ymgynghoriad trylwyr yn digwydd gydag aelodau etholedig, penaethiaid/athrawon, rhieni a llywodraethwyr cyn gweithredu'r cynigion ar gyfer yr ysgolion hynny yng Nghategori A o'r Cynllun Cyfansawdd.
 - (b) Gofyn i'r Cyfarwyddwr Strategol Datblygu gyflwyno adroddiad terfynol ar y cynigion mewn perthynas ag ysgolion a restrir yng Nghategori A ym mis Mehefin/Gorffennaf 2008 yn dilyn y cyfnod ymgynghori.
 - (c) Cymeradwyo i dderbyn, fel sail cynllunio, rhestr Categori B a C yn y Cynllun Cyfansawdd a chynnal y cyfnodau ymgynghori yn unol â'r amserlen a amlinellir yn yr adroddiad.
- 1.5. Trafodwyd cynnwys y ddogfen yng nghyfarfod y Bwrdd ar 20 Tachwedd, 2007.
- 1.6. Dyma oedd penderfyniad Bwrdd y Cyngor:
 - (a) Cymeradwyo mewn egwyddor, nôd, amcanion a phrif strategaeth y Cynllun a sicrhau bod ymgynghoriad trylwyr yn digwydd gydag Aelodau Etholedig, Penaethiaid/Athrawon, Rhieni a Llywodraethwyr cyn gweithredu'r cynigion ar gyfer yr ysgolion hynny yng Nghategori A o'r Cynllun Cyfansawdd.

- (b) Awdurdodi'r Cyfarwyddwr Strategol Datblygu i gyflwyno adroddiad terfynol ar y cynigion mewn perthynas ag ysgolion a restrir yng Nghategori A ym mis Mehefin/Gorffennaf 2008 yn dilyn y cyfnod ymgynghori.
- (c) Cymeradwyo, fel sail cynllunio, rhestr Categori B a C yn y Cynllun Cyfansawdd, a chynnal y cyfnodau ymgynghori yn unol â'r amserlen a amlinellir yn yr adroddiad.
- (ch) Awdurdodi'r Cyfarwyddwr Strategol Datblygu, mewn ymgynghoriad â'r Arweinyddion Portffolio perthnasol, i roi cynllun ymgynghori manwl yn ei lefydd yn sicrhau amser digonol ar gyfer cynnal y drafodaeth gyhoeddus ar strategaeth y cynllun a'r cynigion unigol - gan adrodd ar y mater i gyfarfod o'r Cyngor ar y 13 Ragfyr, 2007.
- (d) Awdurdodi ymgymryd ag asesiad ardrawiad ieithyddol a chymdeithasol ymhob ardal i'w gynnwys fel rhan o'r adroddiad.

2. GWYBODAETH YCHWANEGOL I'R CYNGOR LLAWN

- 2.1. Roedd Aelodau'r Pwyllgor Craffu Plant a Phobl Ifanc a Bwrdd y Cyngor yn awyddus i gael gwybodaeth ychwanegol ar rai agweddau o'r Cynllun.
- 2.2. Er mwyn ymateb i sylwadau rhai o Aelodau'r Pwyllgor a'r Bwrdd, cyflwynwn - yn yr Atodiad i'r adroddiad hwn - gyfres o bapurau o dan y penawdau canlynol:
 - Cofnodion a Phenderfyniad y Pwyllgor Craffu Plant a Phobl Ifanc (25 Hydref, 2007) [*Papur 1*];
 - Cofnodion a Phenderfyniad Bwrdd y Cyngor (20 Tachwedd, 2007) [*Papur 2*];
 - Manylion y Cynllun Ymgynghori Diwygiedig [*Papur 3*];
 - Manylion y Cynllun Cyfansawdd Diwygiedig [*Papur 4*];
 - Adroddiad pellach ar Ysgolion Ffederal gan Gareth Davies Jones, Cyn Arolygydd Ei Mawrhydi ac Ymgynghorydd Annibynnol [*Papur 5*];
 - Atebion i Gwestiynau a Ofynnir yn Aml [*Papur 6*];
 - Briff er mwyn Asesu Effaith Ieithyddol [*Papur 7*].
- 2.3. Y newid mwyaf arwyddocaol ers y Pwyllgor Craffu Plant a Phobl Ifanc yw'r bwriad i ymestyn y cyfnod ymgynghori. Bydd gweithredu'r Cynllun Ymgynghori Diwygiedig yn rhoi amser digonol i gymunedau gyflwyno sylwadau, barn a syniadau pellach a bydd yn dylanwadu ar yr amserlen wreiddiol o gau rhai ysgolion a sefydlu Ysgolion Ffederal. Cyflwynir gwybodaeth ychwanegol ar hyn yn y Cynllun Cyfansawdd yn yr Atodiad.
- 2.4. Mae'r camau y bwriedir eu cymryd ar gyfer ymgynghori ar y ddogfen a'i chynigion wedi eu hamlinellu'n glir yn yr Atodiad.
- 2.5. Cyflwynir isod yr amserlen o ran adrodd yn ôl i'r Cyngor Llawn er mwyn gwneud penderfyniadau terfynol ar y cynigion:

Mai / Mehefin 2008 – Y Cyngor yn ystyried canlyniadau ymgynghori cyffredinol ar nôd, amcanion a strategaeth y Cynllun Drafft, cyn eu cymeradwyo'n derfynol;

- Medi / Hydref 2008** – Y Cyngor Llawn yn ystyried canlyniadau'r ymgynghori ar gynigion Categori A y Cynllun, ac os oes cefnogaeth, cyfarwyddo'r Gwasanaeth i gyhoeddi rhybuddion statudol o fwriad i gau'r ysgolion perthnasol. *Dyma'r cyfarfod fydd yn gwneud penderfyniad terfynol y Cyngor ar ysgolion Categori A.*
 - Medi / Hydref 2009** – Y Cyngor Llawn yn ystyried canlyniadau'r ymgynghori ar gynigion Categori B y Cynllun, ac os oes cefnogaeth, cyfarwyddo'r Gwasanaeth i gyhoeddi rhybuddion statudol perthnasol. *Dyma'r cyfarfod fydd yn gwneud penderfyniad terfynol y Cyngor ar Ysgolion Categori B.*
 - Medi / Hydref 2010** – Y Cyngor Llawn yn ystyried canlyniadau'r ymgynghori ar gynigion Categori C1 y Cynllun, ac os oes cefnogaeth, cyfarwyddo'r Gwasanaeth i gyhoeddi rhybuddion statudol perthnasol. *Dyma'r cyfarfod fydd yn gwneud penderfyniad terfynol y Cyngor ar Ysgolion Categori C1.*
 - Medi / Hydref 2011** – Y Cyngor Llawn yn ystyried canlyniadau'r ymgynghori ar gynigion Categori C2 y Cynllun, ac os oes cefnogaeth, cyfarwyddo'r Gwasanaeth i gyhoeddi rhybuddion statudol perthnasol. *Dyma'r cyfarfod fydd yn gwneud penderfyniad terfynol y Cyngor ar Ysgolion Categori C2.*
 - Medi / Hydref 2012** – Y Cyngor Llawn yn ystyried canlyniadau'r ymgynghori ar gynigion Categori C3 y Cynllun, ac os oes cefnogaeth, cyfarwyddo'r Gwasanaeth i gyhoeddi rhybuddion statudol perthnasol. *Dyma'r cyfarfod fydd yn gwneud penderfyniad terfynol y Cyngor ar Ysgolion Categori C3.*
- 2.6. Y bwriad yn syml, yw gofyn am hawl y Cyngor Llawn yn ei gyfarfod heddiw i gychwyn y broses ymgynghori ar gynnwys y ddogfen a'i chynigion - a hynny yn unol â'r rhaglen ymgynghori yn yr Atodiad.
- 2.7. Nid oes unrhyw benderfyniad yn cael ei wneud heddiw fydd yn golygu cau ysgol, sefydlu Ysgol Ffederal neu Ysgol Ardal. Gofyn am gyfle i gynnal trafodaeth agored a chyhoeddus a wneir, cyn penderfynu'n derfynol ar drefniant newydd i Ysgolion Cynradd y Sir i'r dyfodol.

3. ARGYMHELLIAD

- I gymeradwyo cyfnod o ymgynghori ar y ddogfen drafft "*Ad-drefnu Ysgolion Cynradd y Sir er Lles Addysg Holl Blant Gwynedd*";
- I gymeradwyo'r rhaglen ymgynghori fel y'i cyflwynir yn y "*Cynllun Ymgynghori Diwygiedig*" yn yr Atodiad;
- I gefnogi'r bwriad i ymgymryd ag asesiad ardrawiad ieithyddol a chymdeithasol o weithredu cynigion y ddogfen.